

TRIBUNA POLITICA

Doris Day, Emile de Girardin ed ils megatrends

DA PETER PEYER,
CUSSEGLIER GUVERNATIV

Tge porta l'avegnir? E cura cumenza quel u essan nus schizunt gia entamez? E tge svilups pretendan tge acziuns? La risposta «Quai che vegn ad esser, vegn ad esser» na basta en mintga cas betg pli.

Quellas e quels in pau pli vegls tranter nus sa regordan forsa anc dal semperverd «Que sera, sera». La chanzun da pop è vegnida scritta per il film da Hitchcock «Der Mann, der zuviel wusste». En il film chanta Doris Day la chanzun ch'è vegnida undrada l'onn 1957 cun il Premi Oscar per la meglra chanzun. En las paradas da hits ha ella cuntanschì las plazzas a la testa. Il text da la chanzun è simpel. El tracta la dumonda tge che l'avegnir porta, e la resposta è adina la medema: «Quai che vegn ad esser, vegn ad esser.»

Quai che vegn ad esser, ha gia adina occupà l'umanità. Ma perquai che nus na pudain betg propi guardar en l'avegnir stuain nus far supposiziuns. Quellas sa laschan deducir da l'experiencescha e da l'istorgia u prognostigar a maun da svilups currentes. Betg scientificamain exact, ma sco trend e basa per noss agir en la societad, en



l'economia ed en la politica. Natiralmain che tals trends pon er vegnir designads sco narradads e vegnir contestads. Quai musa exemplaricamain la debatta actuala davart la midada dal clima. Tgi ch'interpretescha dentant trends en moda correcta, procura per avantatgs economics, po integrar a temp svilups socials u er minimar ristgas e privels. Gist per la politica vali la paina da s'occupar da las direziuns impurtantas da noss avegnir. Gea, atgnamain avess ina politica da responsabladad praticamain l'obligaziun da far quai. Confurm al motto dal politicher parisian, schurnalist ed editur Emile de Girardin: «Gouverner c'est prévoir – reger vul dir prevesair.»

Lain pia prevesair in zic. L'institut da l'avegnir tudestg numna ils suandants megatrends, dals quals nus avain da s'occupar: individualisaziun, gendershift, silversociety, cul-

tura da savida, new work, sanadad, neo-ecologia, connectivitat, globalisaziun, urbanisaziun, mobilitad, segirezza. La gronda part ans para enconuscenta, er sch'intginas noziuns tunan main spectacularas tar nus (per exempel egualitad, inveteraziun, urbanisaziun), ma n'èn betg main centralas. Il cussegl grond dal Grischun ha deliberà en la sessiun d'avust 2019 las «finamiras e maximas politicas surordinadas». Sin basa da quellas vegn la regenza a definir il program da la regenza 2021–2024. Ed ad adattar ils megatrends a dumondas impurtantas per nus sco avunda personal per noss sistem da milissa, meglra cumpatibilitad da la professiun cun la famiglia, avunda plazzas en chasas da persunas attempadas e da tgira, furmaziun da scola auta en il Grischun, novas furmas da lavur en l'administraziun, stgaffir regiuns da provediment da la sanadad, protecziun dal clima, conducts da datas svelts, martgads da turissem che sa midan, dumagnar chargias da centers urbans, promover il traffic public, dumagnar smanatschas.

L'avegnir vegn ad esser, sco quai ch'el vegn ad esser. Ma nus duessan tuttinans preparar.

Dapli infurmaziuns davart il tema tranter auter qua:
www.zukunftsinstitut.de